

page :

K067

條目：

七功德

內容：

『未曾起伽藍處，於中興立者，……能持床座施彼僧伽藍者，……以食施彼比丘僧，……以遮雨衣給施比丘僧者，……以藥施比丘僧者，……曠野作好井者，……近道作舍，使當來過去得止宿者。……七功德之法，其福不可稱量。若行，若坐，正使命終，其福隨後，如影隨形，其德不可稱量。』增七日品 7.

出處：

※參見《增壹阿含經》卷 35〈七日品 40〉(七) (CBETA, T02, no. 125, p. 741, c3-25)：

世尊告曰：「增益有七事，其福不可稱量，亦復無人能算計此者。云何為七？於是，族姓子、若族姓女未曾起僧伽藍處，於中興立者，此福不可計。

「復次，均頭！若善男子、善女人能持床座施彼僧伽藍者及與比丘僧，是謂，均頭！第二之福不可稱計。

「復次，均頭！若善男子、善女人以食施彼比丘僧，是謂，均頭！第三之福不可稱計。

「復次，均頭。若善男子、善女人以遮雨衣給施比丘僧者，是謂，均頭！第四功德其福不可量。

「復次，均頭！若族姓子、女若以藥施比丘僧者，是謂第五之福不可稱計。

「復次，均頭！若善男子、善女人曠野作好井者！是謂，均頭！第六之功德也，不可稱計。

「復次，均頭！善男子、善女人近道作舍，使當來過去得止宿者，是謂，均頭！第七功德不可稱計。

「是謂，均頭！七功德之法，其福不可量。若行，若坐，正使命終，其福隨後，如影隨形，其德不可稱計，言當有爾許之福，亦如大海水不可升斗量之，言當有爾許之水。此七功德亦復如是，其福不可稱限。是故，均頭！善男子、善女人當求方便，成辦七功德。如是，均頭！當作是學。」

條目：

一切皆空

內容：

『一切諸行皆空、皆寂，起者、滅者皆是幻化，無有真實。』增七日品 8.

出處：

※參見《增壹阿含經》卷 35〈七日品 40〉（八）(CBETA, T02, no. 125, p. 742, a22-b2)：

是時，世尊重告比丘：「其能如婆迦利比丘者，此則名為思惟死想。彼比丘者，善能思惟死想，厭患此身惡露不淨。若比丘思惟死想，繫意在前，心不移動，念出入息往還之數，於其中間思惟七覺意，則於如來法多所饒益。所以然者，**一切諸行皆空、皆寂，起者、滅者皆是幻化，無有真實。**是故，比丘！當於出入息中思惟死想，便脫生、老、病、死、愁、憂、苦、惱。如是，比丘！當知作如是學。」

條目：

生天之因

內容：

『修正見，淨三業，想意使不移動，便得生天上。』增七日品 9.

出處：

※參見《增壹阿含經》卷 35〈七日品 40〉（九）(CBETA, T02, no. 125, p. 742, c12-28)：

【按：亦參 M. 18. Madhupiṇḍika.】

「是時，天師阿私陀便說此偈：

「『心內若干念， 外服而麁獷， 但勤**修正見**， 遠離於惡道。

心戒清淨行， 口行亦復然， 遠離於惡念， 必當生天上。』

「是時，七梵志白天師曰：『審是天師乎？』報曰：『是也。但今梵志不以裸形得生天上；未必修此苦行，得生梵天之處，又非露暴形體，作若干苦行，得生彼處；**能攝心意，使不移動，便生天上。**不可以卿等所習得生彼處。』大王！觀察此義，不以裸形名為阿羅漢，其凡夫之人欲知真人者，此事不然，然復真人能分別所習凡夫之行。又復凡夫之人不能知凡夫之行，真人便能知凡夫之行。但大王知之，當方便知久遠已來，非適今也。當以觀之。如是，大王！當以方便學之。」

條目：

苦本

內容：

『恩愛無明本，興諸苦惱患，彼滅而無餘，便無復有苦。』增莫畏品 2.

出處：

※參見《增壹阿含經》卷 35〈莫畏品 41〉(二) (CBETA, T02, no. 125, p. 745, a6-8)：

是時，尊者那伽婆羅便說此偈：

「恩愛無明本， 興諸苦惱患， 彼滅而無餘， 便無復有苦。」

條目：

親七處善

內容：

『以慈心遍滿一方、二方、三方、四方，四維上下，亦復如是，盡於世間以慈心遍滿其中。悲、喜、護心，空，無相、願，亦復如是。……如是觀七處。』增莫畏品 3.

出處：

※參見《增壹阿含經》卷 35〈莫畏品 41〉(三) (CBETA, T02, no. 125, p. 745, b8-14)：

【按：亦參 S. 22. 57. Sattatṭhāna.】

爾時，世尊告諸比丘：「當觀七處之善，又察四法，於此現法之中名為上人。云何，比丘！觀七處之善？於是，比丘！以慈心遍滿一方、二方、三方、四方，四維上下，亦復如是，盡於世間以慈心遍滿其中。悲、喜、護心，空，無相、願，亦復如是。諸根具足，飲食自量，恒自覺悟。如是，比丘！觀七處。」

條目：

察四處法

內容：

『內自觀身，除去愁憂身意止；……內外觀法，法意止。如是觀四處之善。』增莫畏品 3.

出處：

※參見《增壹阿含經》卷 35〈莫畏品 41〉(三) (CBETA, T02, no. 125, p. 745, b14-21)：

【按：亦參 S. 22. 57. Sattaṭṭhāna.】

「云何，比丘！察四處之法？於是，比丘！內自觀身，除去愁憂，身意止，外復觀身身意止；內外觀身身意止。內自觀痛痛意止；外自觀痛痛意止；內外觀痛痛意止。內觀心心意止；外觀心心意止；內外觀心心意止，除去愁憂，無復苦患。內觀法法意止；外觀法法意止，內外觀法法意止。如是，比丘！觀四法之善。」

條目：

上人

內容：

『能如是七處善及察四法，於此現法中名為上人。』增莫畏品 3.

出處：

※參見《增壹阿含經》卷 35〈莫畏品 41〉(三) (CBETA, T02, no. 125, p. 745, b21-24)：

【按：亦參 S. 22. 57. Sattaṭṭhāna.】

「若復，比丘！如是七處善及察四法，於此現法中為上人。是故，比丘！當求方便，辦七處之善及觀四法。如是，比丘！當作是學。」

條目：

無常、苦、無我、空

內容：

『無常者即是苦，苦者無我，無我者空也。……其實空者，彼無我、空，如是智者之所學也。此五盛陰皆空、皆寂，因緣合會皆歸於磨滅，不得久住。』增莫畏品 4.

出處：

※參見《增壹阿含經》卷 35〈莫畏品 41〉(四) (CBETA, T02, no. 125, p. 745, c15-23)：

諸比丘報曰：「設當有人來問者，我當以此義報之：『色者無常，其無常者即是苦也；苦者無我，無我者空，以空無我、彼空，如是智者之所觀也。痛、想、行、識亦復無常、苦、空、無我，其實空者彼無我、空，如是智者之所學也。此五盛陰皆空、皆寂，因緣合會皆歸於磨滅，不得久住。八種之道，將從有七，我師所說正謂此耳。』若刹利、婆羅門、人民之類，來問我義者，我等當以此義報之。」

條目：

八道及七法

內容：

『若一心念正見者，念覺意不亂也；等治者，念一心一切諸法，法覺意也；等語者，身意精進，精進覺意也；等業者，一切諸法得生，喜覺意也；等命者，知足於賢聖之財，悉捨家財，安其形體，猗覺意也；等方便者，得賢聖四諦，盡除去諸結，定覺意也；等念者，觀四意止，身無牢固，皆空無我，護覺意也；等三昧者，不獲者獲，不度者度，不得證者使得證也。』增莫畏品 4.

出處：

※參見《增壹阿含經》卷 35〈莫畏品 41〉(四) (CBETA, T02, no. 125, p. 746, a2-13)：

舍利弗告曰：「若一心念正見者，念覺意不亂也；等治者，念一心一切諸法，法覺意也；等語者，身意精進，精進覺意也；等業者，一切諸法得生，喜覺意也；等命者，知足於賢聖之財，悉捨家財，安其形體，猗覺意也；等方便者，得賢聖四諦，盡除去諸結，定覺意也；等念者，觀四意止，身無牢固，皆空無我，護覺意也；等三昧者，不獲者獲，不度者度，不得證者使得證也。設當有人來問此義：『云何修八種道及七法？』汝等當如是報之。所以然者，八種道及七法，其有比丘修此者，有漏心便得解脫。」

條目：

千年後法衰之記

三大劫

內容：

『吾涅槃後千歲餘，當有比丘於禪退轉，不復行頭陀之法；亦不乞食、著補納衣，貪長者請受其飲食；亦不在樹下閑居之處，好喜莊飾房舍，亦不用大小便為藥，但著餘藥草，極甘美者；或於其中貪著財貨，恣惜房舍，恒共鬥諍。……剃除鬚髮而習家業，左抱男，右抱女，又執箏簫在街巷乞食。……捨八種道及七種法，如我今日以三阿僧祇劫所集法寶。將來比丘以為歌曲，在眾人中乞食以自濟命。』增莫畏品 5.

出處：

※參見《增壹阿含經》卷 35〈莫畏品 41〉(五) (CBETA, T02, no. 125, p. 746, b7-27)：

世尊告曰：「善哉！善哉！迦葉多所饒益，為世人民作良友福田。迦葉當知，吾般涅槃後千歲餘，當有比丘於禪退轉，不復行頭陀之法；亦無乞食、著補納衣，貪受長者請其衣食；亦復不在樹下閑居之處，好喜莊飾房舍，亦不用大小便為藥，但著餘藥草，極甘美者；或於其中貪著財貨，恣惜房舍，恒共鬭諍。爾時，檀越施主篤信佛法，好喜惠施，不惜財物。是時，檀越施主命終之後盡生天上，比丘懈怠者，死入地獄中。如是，迦葉！一切諸行皆悉無常，不得久保。」

「又迦葉當知，將來之世，當有比丘剃鬚髮而習家業，左抱男，右抱女，又執箏簫在街巷乞食。爾時，檀越施主受福無窮，況復今日至誠乞食者。如是，迦葉！一切行無常，不可久停。」

「迦葉當知，將來之世，若有沙門比丘當捨八種道及七種之法，如我今日於三阿僧祇劫所集法寶。將來諸比丘以為歌曲，在眾人中乞食以自濟命，然後檀越施主飯彼比丘眾，猶獲其福，況復今日而不得其福乎！」

條目：

付法

內容：

付迦葉阿難。增莫畏品 5.

出處：

※參見《增壹阿含經》卷 35〈莫畏品 41〉（五）(CBETA, T02, no. 125, p. 746, b27-c3)：

「我今持此法付授迦葉及阿難比丘。所以然者，吾今年老以向八十，然如來不久當取滅度，今持法寶付囑二人，善念誦持，使不斷絕，流布世間。其有遏絕聖人言教者，便為墮邊際。是故，今日囑累汝經法，無令脫失。」

條目：

八難

內容：

『若如來出現世時，廣演法教，得至涅槃、如來之所行，然此眾生在地獄中，不聞不覩。……在畜生中。……在餓鬼中。……在長壽天上，不聞不覩。……在邊地生，誹謗賢聖，造諸邪業。……生於中國，又且六根而不完具，亦復不別善惡之法。……雖復六根完具，無所缺漏，然彼眾生心識邪見。……如來不出世，……此眾生生在中

國，六情完具，堪任受法，聰明高才，聞法則解，修行正見。……有此八難，非梵行所修行。』增八難品 1.

出處：

※參見《增壹阿含經》卷 36〈八難品 42〉（一）(CBETA, T02, no. 125, p. 747, a8-b7)：

【按：亦參 A. VIII. 29. Akkhaṇa.】

爾時，世尊告諸比丘：「凡夫之人不聞不知說法時節。比丘當知，有八不聞時節，人不得修行。云何為八？若如來出現世時，廣演法教，得至涅槃、如來之所行，然此眾生在地獄中，不聞不覩，是謂初一難也。

「若復如來出現世時，廣演法教，然此眾生在畜生中，不聞不覩，是謂第二之難。

「復次，如來出現世時，廣說法教，然此眾生在餓鬼中，不聞不覩，是謂此第三之難也。

「復次，如來出現世時，廣演法教，然此眾生在長壽天上，不聞不覩，是謂第四之難也。

「復次，如來出現世時，廣演法教，然此眾生在邊地生，誹謗賢聖，造諸邪業，是謂第五之難。

「復次，如來出現世時，廣演法教，得至涅槃，然此眾生生於中國，又且六情不完具，亦復不別善惡之法，是謂第六之難也。

「若復如來出現世時，廣演法教，得至涅槃，然此眾生在於中國，雖復六情完具，無所缺漏，然彼眾生心識邪見：無人、無施、亦無受者，亦無善惡之報，無今世、後世，亦無父母，世無沙門、婆羅門等成就得阿羅漢者，自身作證而自遊樂，是謂第七之難也。

「復次，如來不出現世，亦復不說法使至涅槃者，又此眾生生在中國，六情完具，堪任受法，聰明高才，聞法則解，修行正見：便有物、有施、有受者，有善惡之報，有今世、後世，世有沙門、婆羅門等修正見，取證得阿羅漢者，是謂第八之難。非梵行所修行，是謂，比丘！有此八難，非梵行所修行。」